

**Raja Ideris nyatakan hasrat tidak bertanding PRU-13**  
**Utusan Online**  
**05 Februari, 2013**

SABAK BERNAM 4 Feb. - Ahli Dewan Undangan Negeri (ADUN) Sungai Air Tawar, Datuk Raja Ideris Raja Ahmad (gambar) hari ini menyatakan secara terbuka untuk tidak lagi bertanding dalam Pilihan Raya Umum Ke-13.

Wakil rakyat selama lima penggal itu berkata, sudah tiba masa untuk beliau berundur bagi memberi laluan kepada muka baru dalam menggalas mandat Barisan Nasional (BN) bagi mempertahankan kerusi tersebut.

Dengan keputusan tersebut, Raja Ideris dipercayai menjadi wakil rakyat BN yang pertama mengemukakan hasrat untuk tidak dicalonkan lagi.

"Keputusan ini saya ambil dengan hasrat supaya dapat memberi ruang dan peluang kepada generasi muda yang boleh dibimbing untuk menjadi pemimpin di kawasan ini.

"Bagaimanapun saya bersedia memberi apa juga sokongan, bantuan dan bimbingan kepada pelapis saya kelak," katanya ketika ditemui pemberita di pejabatnya di sini.

Dalam pilihan raya umum 2008, Raja Ideris berjaya mengekalkan kerusi DUN Sungai Air Tawar setelah menewaskan calon Pas, Azrul Khakim Suradi dengan majoriti tipis 123 undi.

Raja Ideris yang berkecimpung dalam politik sejak 1966 itu memberitahu, beliau belum ada perancangan tertentu untuk dilakukan selepas pengundurannya.

"Tempoh 48 tahun satu jangka masa yang lama. Banyak yang saya terlepas terutamanya masa bersama keluarga. Jadi sudah tiba masanya untuk saya lebih memberikan fokus kepada mereka," katanya.

Menurutnya, nama-nama calon dalam kalangan golongan pelapis telah dihantar ke peringkat bahagian dan terserah kepada pucuk pimpinan parti untuk membuat keputusan.

Beliau turut melahirkan keyakinan BN akan dapat mengekalkan kerusi DUN tersebut dalam pilihan raya umum akan datang.

"Kita memiliki penyokong yang kuat dan setia. Saya berbangga dan berterima kasih kepada penyokong BN DUN Sungai Air Tawar yang sentiasa menyokong kami.

"Keyakinan dan kesetiaan mereka terhadap parti tidak sedikit pun terusik meskipun parti pembangkang sering cuba mempengaruhi mereka dengan menimbulkan isu remeh-temeh," katanya.

Hakcipta Terpelihara © UTUSAN MELAYU (M) BERHAD

Source: [http://www.utusan.com.my/utusan/Pilihan\\_Raya/20130205/px\\_02/Raja-Ideris-nyatakan-hasrat-tidak-bertanding-PRU-13](http://www.utusan.com.my/utusan/Pilihan_Raya/20130205/px_02/Raja-Ideris-nyatakan-hasrat-tidak-bertanding-PRU-13)

